




REVISTA SITUASAUN – ABRÍL 2017

ASUNTU NE'EBÉ PRESIZA TAU ATENSAUN

- ▶ **Insidente Violénsia Rejista ho Númeru Aas iha Postu Administrativu Balun Husi Outubru 2016 To'o Abril 2017;**
- ▶ **Insidente Violénsia Liga ba Eis-GAM no GAR Sa'e Fali iha Fulan Abrid;**
- ▶ **Insidente Violénsia Envolve Pesoál PNTL Tun, Maibé Rejista Insidente Sériu 2 iha Fulan Abrid.**

INSIDENTE VIOLÉNSIA REJISTA HO NÚMERU AAS IHA POSTU ADMINISTRATIVU BALUN HUSI OUTUBRU 2016 TO'O ABRÍL 2017

Husi fulan Outubru 2016 to'o fulan Abrid 2017, Sistema Atensaun no Responde Sedu (AtReS) rekolla insidente violénsia ho númeru aas ka ho average (*rata-rata*) insidente 4 ba leten kada fulan iha Postu Administrativu sira hanesan Dom Aleixo, Nain Feto, Cristo Rei, Vera Cruz, Baukau, Same, Bazartete, Manatutu, Vikeké no Maliana. Insidente violénsia ne'ebé akontese barak liu iha fulan Abrid mak iha Postu Administrativu Dom Aleixo ho total insidente hamutuk 15, no kompara ba periodu fulan Outubru 2016 to'o Abril 2017 ho average (*rata-rata*) mak insidente 15.3 kada fulan. Bele haree grafiku ba Postu Administrativu seluk tuir mai.



Total Insidente Violénsia iha Abrid 2017	
Munisipiu	Insidente
Aileu	5
Ainaru	3
Baukau	13
Bobonaru	6
Covalima	3
Dili	55
Ermera	8
Lautein	5
Likisá	7
Manatutu	3
Manufahi	9
Oekusi	9
Vikeké	6
Total	132

INSIDENTE VIOLÉNSIA LIGA BA EIS-GAM NO GAR SA'E FALI IHA FULAN ABRÍL

Iha Abrid 2017, rejista insidente violénsia 13 ne'ebé liga ho eis-Grupu Arte Marsial (GAM) ne'ebé governu bandu ona no Grupu Arte Ritual (GAR). Númeru ne'e sa'e fali kompara ho fulan Marsu 2017 ne'ebé akontese de'it insidente 3 (sa'e dala 4).

Insidente violénsia liga ho eis-GAM no GAR mak hanesan:

Iha Munisipiu Baukau akontese insidente 9 – Insidente akontese dala 4 iha Aldeia Samalakuliba, Suku Buibau, Postu Administrativu Baukau, ne'ebé grupu joven asaltu joven ida seluk to'o kanek grave. Insidente ne'e hamosu tan insidente 2 seluk tanba odi vingansa. Abut problema mai husi hadau malu pasajeiru no iha problema anteriór. Iha fatin hanesan akontese mós membru eis-GAM halo asaltu ba estudante tanba odi vingansa. Membru eis-GAM mós asaltu malu iha loran Basar tanba odi vingansa iha Aldeia Loilaku, Suku Nunira, Postu Administrativu Laga, ne'ebé rezulta ema na'in rua hetan kanek. Iha Aldeia Lialaisesu, Suku Tirilolo, Postu Administrativu Baukau, eis grupu GAM asaltu malu rezulta na'in 3 hetan kanek. Insidente ne'e hetan intervensaun husi PNTL no F-FDTL no konsege kaer membru balun. Iha Aldeia Uaimanuboe, Suku Wailili, Postu Administrativu Baukau mós akontese hanesan maibé hetan intervensaun husi membru comunidade balun. Iha Aldeia Bahalale, Suku Uato-Lari, Postu Administrativu Vemasse, akontese dala 2, ne'ebé membru eis-GAM komesa ho hemu tua no lanu depois asaltu malu, ne'ebé halo comunidade sira ta'uk.

Iha Munisipiu Dili akontese insidente 3 - Iha Aldeia Lurumata, Suku Fatuhada, Postu Administrativu Dom Aleixo akontese dala 2, ne'ebé eis-GAM provoka malu no koko forsa ba malu (sparing) no halo comunidade ta'uk no laiha intervensaun husi parte ruma, maibé bainhira atu akontese tan ba dala 2, PNTL halo kedas intervensaun. Iha Aldeia Has Laran, Suku Bemori, Postu Administrativu Nain Feto, akontese joven sira tuda ema ne'ebé sa'e motor tanba odi entre bairru no liga mós ho eis-GAM no GAR.

Iha Munisipiu Ermera akontese dala 1 - Iha Aldeia Aitemua, Suku Fatubolu, Postu Administrativu Hatolia akontese membru eis-GAM baku malu ho estudante husi Eskola Pre-Sekundária ida. Problema ne'e akontese tanba sira odi malu liga ba problema eis-GAM. Polisia mak halo intervensaun ba problema ne'e, maibé seidauk rezolve.


INSIDENTE VIOLÉNSIA ENVOLVE MEMBRU PNTL TUN, MAIBÉ REJISTA SÉRIU 2 IHA FULAN ABRÍL 2017

Tuir dados monitorizasaun Sistema AtReS, insidente violénsia ne'ebé envolve pesoál PNTL tun komesa kedas husi Janeiro 2017 ho númeru insidente 3, Fevereiro 2 no Marsu 6 liga ho seguransa ba eleisaun prezidensial, no tun fali ba 3 iha Abrid no 2 konsidera sériu.


Insidente ne'ebé envolve membru PNTL mak hanesan: Iha Same (Manufahi), Pesoál PNTL uza stick hodi baku, tuku no tebe estudante estajiáriu UNPAZ na'in 4 iha Ospital Same.

Momentu ne'ebá doutór sira halo intervensaun atu labele baku estudante sira iha ospital, maibe pesoal PNTL sira kontinua baku estudante sira. Insidente ne'e akontese tanba deskonfia estudante sira halo barullu ho motor; Iha Maliana (Bobonaru) Pesoal PNTL (BOP) asaltu no baku joven ida to'o kanek grave tanba abuzu PNTL la akalma situaun iha jogu futebol. Momentu ne'ebá membru BOP sira mos tiru *gas air mata* ba adeptu sira ne'ebé assiste hela jogu; iha Passabe (RAEOA) pesoal PNTL husi Unidade UPF ida baku mane ida to'o inus ran. Momentu ne'ebá pesoal UPF ne'e lanu no monu ho motor, no Mane ne'e ba atu ajuda nia maibe pesoal UPF ne'e fila baku mane refere. PNTL Eskuadra Passabe halo intervensaun kedas ba insidente ne'e.


KARATERÍSTIKA INSIDENTE




Ma neebe hahu halo violensia nia pozisaun husi numeru 3 ba leten




Ma ne'ebe hahu halo violensia nia jeneru



Vitima nia pozisaun husi numeru 4 ba leten




Vitima nia jeneru




Fator hamosu insidente violensia husi numeru 3 ba leten



Impaktu



Se mak responde



ATIVIDADE PREVENSAN NO RESPONDE BA KONFLITU

Atividade Ne'ebé Hala'o Husi Ekipa Sistema Atensaun no Responde Sedu (AtReS)

▶ Atu redús violénsia iha tempu eleisaun, prezisa konsensializa comunidade eleitór iha baze, maibé ne'e de'it seidauk to'o. Tuir dadus AtReS, iha mós problema seluk ne'ebé mosu iha tempu Eleisaun Prezidensiál, tanba fallansu balun hanesan sentru votasaun limitadu no oras la to'o, ne'ebé halo ema barak la bele vota. Aprovasaun lei iha tempu badak liu, la fó espasu ba órgaun eleitór sira halo preparasaun di'ak liu. Ho razau ida ne'e iha loraun 20 Abril 2017, Edifísiu Direitu Umanus ONU iha Timor-Leste, Jestor AtReS partisipa enkontru regular ho membru governu, sosiedade sivil (NGO nasional no internasionál) no representante Instituisaun seluk hodi fahé informasaun kona-ba dezvoltamentu Direitu Umanus iha Timor-Leste. Tópiku importante ida mak fahé informasaun liga ba Eleisaun Prezidensiál ne'ebé akontese iha loraun 20 Marsu 2017 liu ba. CNE no STAE sai hanesan oradór prinsipál iha sorumutu ne'e. Belun mós hetan oportunidade hodi apresenta rezultadu monitorizasaun insidente violénsia eleitorál iha Eleisaun Prezidensiál 2017.



- ▶ Atu halo prevensaun ba insidente violénsia eleitorál no hasa'e tasa partisipasaun votante iha Eleisaun Parlamentár 2017 mak ONG Belun liu husi Rede Prevensaun no Responde Konfliktu (RPRK) Postu Administrativu Hatolia, Munisipiu Ermera iha loron 25 Abril 2017 fasilita Edukasaun Sívika no Edukasaun Votante ba lideransa komunitária, representante Partidu Polítiku, juventude no estudante sira, iha Salaun Parókia Hatolia. Iha eventu ne'e RPRK kooperasaun másimu ho Komisaun Nasionál Eleisaun (CNE) nivel nasionál no nivel munisipiu. Oradór prinsipál hanesan CNE fahe informasaun kona-ba Resensiamentu Eleitorál, Lei Eleitorál no Krime Eleitorál. Ho atividade ne'e, Belun liu husi Sistema AtReS fiar bele redús tensaun konfliktu ne'ebé mosu iha tempu kampaña, tempu eleisaun no tempu depois eleisaun iha eleisaun parlamentár 2017;



Atividade Ne'ebé Hala'o Husi Ekipa Programa Apoiu Polisiamentu Komunitária (PAK)

- ▶ Prevensaun konfliktu sai mós knaar importante husi PNTL hodi asegura seguransa iha rai laran. Tanba ne'e iha loron 20 Abril 2017, Konsellu Seguransa Munisipál – KSM Díli halo enkontru trimestre ba daruak iha Salaun Komandante Munisipiu Díli, Caicoli. Belun liu husi Sistema AtReS hato'o mós dados no issue importante balun iha enkontru ne'e hodi integra ho programa PNTL nian liuliu atu asegura eleisaun parlamentár bele la'o dí'ak liu tan. Pontu balu ne'ebé hetan husi enkontru KSM ne'e mak hanesan:
 - Update mós kona-ba apoiu KPK sira ba PNTL hodi asegura seguransa durante eleisaun presidencial ne'ebé mak la'o hakmatek;
 - Problema Arte Marsiál mós sai hanesan issue importante ba KPK hodi identifika sira nia movimentu ne'ebé mak sei hala'o hela, presiza informa ba PNTL kona-ba arte marsiál nia atividade karik sira sei hala'o iha suku;
 - Kontrola ema foun ruma ne'ebé mak uza vistu turista halo movimentu iha suku laran informa ba Imigrasaun;
 - Koopera ho PNTL hodi halo prevensaun ba problema sira;
 - Asina karta akordu entrega KPK suku 10 ne'ebé mak tau matan husi Belun ba PNTL hodi tau matan ba oin no Belun hahú ho suku foun iha munisipiu Díli;
 - Entrega simbolikamente sertifikadu ba representante suku rua husi Suku Balibar no Suku Duyung.

Eventu ne'e hetan participa husi Komandante PNTL Munisipiu Díli, Segundu Komandante Munisipiu Díli, Komandante Eskuadra, OPS, Belun, Representante Prezidente Autoridade, Administradór Postu, Xefe suku, Membru KPK no Representante SEM, Fokupers no liña ministerial balun, DNTP no Floresta;

- ▶ Iha fulan Abril, PAK mós fasilita enkontru regular Feto KPK ba Munisipiu Díli iha Edifísiu PNTL Caicoli atu identifika issue, problema ligadu ho asuntu feto no haforsa feto iha area seguransa;
- ▶ PAK mós fasilita semináriu loron ida liga ba kódigu estrada, droga-álkool no pornografia ne'ebé sai hanesan abut problema ba juventude sira. Semináriu ne'e hala'o husi KPK iha Suku Umaberloic, Alas, Manufahi.
- ▶ Papél no knaar OPS sei sai konfuzo ba comunidade no mós ba OPS rasik. Tanba nee, PNTL Munisipiu Likisá hala'o seminar loron ida ne'ebé participa husi membru KPK inklui OPS rasik, atu hatene papél OPS hodi jere KPK iha servisu prevensaun kriminál.

Atividade Ne'ebé Hala'o Husi Ekipa Clínica Asesu ba Justisa

- ▶ Problema rai sai hanesan asuntu importante iha Timor Leste tanba lei ne'e seidak hatuur didi'ak. Atu redús insidente ka krime liga ba rai, realiza sosializasaun no sensibilizasaun Alternativa Rezolusaun Disputa (ARD) ba comunidade iha Postu Administrativu Uatolari, Lospalos no Manatutu;
- ▶ Ekipa Clínica Asesu ba Justisa rejistu kazu disputa rai hamutuk 6 iha Munisipiu Covalima atu halo Mediasaun no kazu 2 hetan ona akordu maibé kazu 4 seidak hetan konkordánsia. Iha mós kazu 2 iha Munisipiu Baukau maibé seidak hetan akordu ka konkordánsia.

KONA-BA REVISTA NE'E

Revista situasaun ne'e relata kona-ba asuntu xave relaciona ho insidente violénsia no tendénsia konfliktu husi koleasaun dados monitorizasaun liuhosi Sistema Atensaun no Responde Sedu (AtReS), ne'ebé kobre iha Postu Administrativu 43, husi Postu Administrativu 65, Suku 275 iha Timor-Leste durante fulan Abril 2017. Belun esforsu atu fahe informasaun ne'ebé up-to-date no serteza ho dados atuál. Hanoin katak, bele hetan mudansa situasaun ho lalais husi kontribuisaun dame ita hotu nian. Ami agradese no simu informasaun seluk ne'ebé bele klarifika ka update dados, liuhosi sistema AtReS.

Marilia Oliveira da Costa, Jestor Sistema AtReS: bylah.belun@gmail.com

Laurensius Lein, Especialista Prevensaun Konfliktu & Polítika: laurensius.belun@gmail.com